



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

IGREYIDI 12

ISINDEBELE ILIMI LOKUTHOMA LOKWENGEZA (FAL)

IPHEPHA LESIBILI (P2)

NOVEMBA 2024

IMITLOMELO: 70

ISIKHATHI: Ama-iri ama-2½

Iphepha lemibuzweli linamakhasi ama-19.

YELELA

1. Umfundi kufanele afunde ikhaseli ngokukhulu ukuyelela ngaphambi kobana aphenhule imibuzo.
2. Ungalingi ufunde iphepha lemibuzo loke. Qala ikhasi lokumunyethweko elisekhasini elilandelako bese utshwaya iinomboro zemibuzo ebuzweko ngeencwadi ozifundileko kilomnyaka. Ngemuva kwalapho, funda imibuzo le bese ukhetha leyo ofisa ukuyiphendula.
3. Iphepheli LINEENGABA EZINE:

ISIGABA A:	Inovela	(35)
ISIGABA B:	Umdlalo	(35)
ISIGABA C:	Iindaba ezifitjhani	(35)
ISIGABA D:	Iinkondlo	(35)
4. Khetha IINGABA EZIMBILI uphendule ngazo.

ISIGABA A: INOVELA
Phendula imibuzo yenovela oyifundileko.

ISIGABA B: UMDLALO
Phendula imibuzo yomdlalo owufundileko.

ISIGABA C: IINDABA EZIFITJHANI
Phendula imibuzo ngeendatjana ZOMBILI.

ISIGABA D: IINKONDLO
Phendula imibuzo ngeenkondlo ZOMBILI.
5. Sebenzisa irhelo lokuhlola ukuqinisekisa bona yoke imibuzo uyiphendulile.
6. Landela imiyalo onikelwe yona ekuthomeni kwaleso naleso sigaba ngokuyelela okukhulu.
7. Nombora iimpendulo zakho ngendlela ezinonjorwe ngayo ephepheni lemibuzo.
8. Thoma isigaba ESINYE NESINYE ekhasini ELITJHA.
9. Isikhathi esiphakanyisweko sokuphendula isigaba ngasinye:

ISIGABA A:	Pheze imizuzu ema-75
ISIGABA B:	Pheze imizuzu ema-75
ISIGABA C:	Pheze imizuzu ema-75
ISIGABA D:	Pheze imizuzu ema-75
10. Tlola ngesandla esihle nesibonakalako.

IKHASI LETHEYIBULA LOKUMUNYETHWEKO:

Abafundi bayeleliswa bona baphendule yoke imibuzo.

ISIGABA A: INOVELA		
Phendula YOKE imibuzo.		
INOMBORO YOMBUZO	IMITLOMELO	INOMBORO YEKHASI
1.1 <i>UBonakele</i>	18	5
1.2 <i>UBonakele</i>	17	6
ISIGABA B: UMDLALO		
Phendula YOKE imibuzo.		
2.1 <i>Umngani</i>	17	8
2.2 <i>Umngani</i>	18	10
ISIGABA C: IINDABA EZIFITJHANI		
Phendula YOKE imibuzo.		
3.1 'Akufudukwa'	17	12
3.2 'Yabe yavela ifukwana'	18	14
ISIGABA D: IINKONDLO		
Phendula YOKE imibuzo.		
4.1 'Kufa'	17	16
4.2 'Umthetho'	18	18

IRHELO LOKUQINISEKISA

Tlola itshwayo (✓) erhelweni lokuqinisekisa elilandelako ukuhlola bona uphendule yoke imibuzo elindelekileko.

ISIGABA	IINOMBORO ZEMIBUZO	INANI LEMIBUZO EZOKUPHENDULWA	ITSHWAYO (✓)
ISIGABA A: UMBUZO 1.1 UMBUZO 1.2	1.1.1–1.1.11 + 1.2.1–1.2.12	1	
ISIGABA B: UMBUZO 2.1 UMBUZO 2.2	2.1.1–2.1.11 + 2.2.1–2.2.13	1	
ISIGABA C: UMBUZO 3.1 UMBUZO 3.2	3.1.1–3.1.11 + 3.2.1–3.2.10	1	
ISIGABA D: UMBUZO 4.1 UMBUZO 4.2	4.1.1–4.1.11 + 4.2.1–4.2.10	1	

ISIGABA A: INOVELA

Phendula YOKE imibuzo.

UMBUZO 1: UBONAKELE – M Sikosana

1.1 Fundisisa itheksthi engenzasi uyizwisise bese uphendula imibuzo elandelako.

ITHEKSTHI A

UKiller azange asona isikhathi, wasuka khonokho watjinga lapha kuhlala khona uBonakele. Bekambethe izambatho zakhe zokugijima. UBonakele wazibonela bonyana uKiller uze ngokumtshwenya njengalaba egade bamtlhorisa ngesitetjhini. Wambona aseza kude. 'Angiphume ngijame ngaphandle, nangu lo abathi nguKiller asiza nganeno.'

5

Waphuma wajama ngaphandle kwekoloji uBonakele, walindela bona uKiller afike. Wabe selafikile uKiller, ikutani yeendubulo. 'Ngizwile ngawe sokana, kodwana lapha kimi ngekhe walunga!' Watjho wabandamela kuBonakele. 'Yewujame khonapho. Ungalingi ubandamele lapha kimi. Angifuni ukugongoda umuntu khona nje mina. Ngisadinwe ngilabesana egade bangitlhorisa ngesitetjhini. Ngiyikhuphile lekanyana abanayo. Nje-ke nawe nangabe awuqalalisi kuhle lapha ugadanga khona, mina ngizakukhombisa indlela ekufanele ukhambe kiyo.'

10

'Madekhethu! Heyi wena sokana. Ukhuluma nobani ngendlela okhuluma ngayo le? Sengiyazibonela nami kwanjesi bonyana baqinisile nabathi uyadelela. NginguKiller wesitjhaba salapha. Ungangitjelani wena ngombana, waziwa ngokuthengisa amahabhula? He ... he ... he ...' Ahleke khulu uKiller. UKiller lo akusikho bonyana uhloye uBonakele ngendlela akhuluma ngayo le, kodwana indaba kukobanyana ulinga ukwakha ubuhlobo naye. 'Abondabazabantu nabathi mina ngiyadelela, alo-ke wena uthini ngalokho?' Kwabuza uBonakele ngommoya ophasi kodwana akhombisa bonyana akayithandi into eyenziwa nguKiller le kuye.

15

20

[Ikhasi 28]

- 1.1.1 Tlola ibizelo ebegade lenziwa nguKiller. (1)
- 1.1.2 Tlola bona uBonakele nakasuka kwabo azipha inarha bekaneminyaka emingaki. (1)
- 1.1.3 Ngokurhunyezweko hlathulula umhlobo werarano ophakathi kwakaKiller noBonakele ovezwe etheksthini engehla. (2)
- 1.1.4 Tlola amabizo wabesana ebebatlhorisa uBonakele esitetjhini. (2)
- 1.1.5 Rhunyeza ihloso kaKiller yokuya lapha kuhlala khona uBonakele. (1)
- 1.1.6 Hlathulula isizathu esenza bona uNaSilombo abe mlingisi oyimbangi enovelini le. Ipendulwakho ayibe maphuzu AMABILI. (2)

- 1.1.7 Hlathulula isehlakalo esakha isisusa serarano enovelini le. (2)
- 1.1.8 Ucabanga bona umtloli bekahloseni ngokusebenzisa umlingisi onguKiller enovelini le? (2)
- 1.1.9 Phendula ngoLIQINISO nofana AKUSILO bese usekela isiqunto osithathako ngephuzu ELILODWA.
- Umndeni wakwaKhoza ukholelwa kuZimu. (1)
- 1.1.10 Isenzo sakaBonakele sokuqotha uNaSilombo SIYAMUKELEKA nofana ASAMUKELEKI? Sekela isiqunto osithathako ngephuzu ELILODWA. (2)
- 1.1.11 Coca wenabe ngommoya otholakala esingenisweni senovela le bewuhlathulule bona uyithinta njani ipilo kaBonakele. (2)
- 1.2 Fundisisa itheksthi engenzasi uyizwisise bese uphendula imibuzo elandelako.

ITHEKSTHI B

UNaMndebele wavuka wahlala, akhange asalala. Ekuseni wathanyela ngendlini njengemhleni. Wenza koke lokhu ibhudango lakhe lebusuku alimsukeli. Limtshwenya njalo. Afune ipendulo kodwana angayifumani. Uthe asathanyela wezwa ngasuthi kukhona okokoda ebadini, wavula.

'Yewungene NaMthimunye mkhozi,' Kwatjho uNaMndebele. 'Uyangirara wena Marry mkhozi. Njalo ungibiza ngoNaMthimunye ngasuthi ibizo lami awulazi. Ungangiluphaza ngisese litlawana elincancani kangaka!' kwatjho uNaMthimunye. 'Lisa ukungihlekisa wena mkhozi. Utjho bonyana umfazi ongangawe nje angazikhohlisa ngokobana usese litlawana ...?' 5

Ahleke uNaMndebele. 'Uyadlala wena Mary, kuluphala othandako la. Sasuka le emakhaya kwantuthu sathi sizozithokozisa la eJwanasbhege. Nje-ke asingazibeki phasi. Mina angekhe ngazithambisa lapha, ngigoma amandlami. Anginamntwana, anginayo nendoda yomtjhado, kunjalo nje angiyifuni ngombana ingathanda ukungilawula kilokho efuna ngikwenze nefuna ngingakwenzi.' 10 15

'NaMthimunye ngizizwa ngingasayithandi indabakho le. Okungcono siyilise. Nanyana sizisebenzela nje, kodwana akukafaneli bona sikhohlwe bonyana sibafazi.' 'Kulungile Mary koke okutjhoko ngiyakubona kodwana indaba yokobana usoloko ungibiza ngoNaMthimunye, angekhe ngiyijamele mina.'

'Yewungilibalele Nompik kodwana e ... indaba yokobana sibizane ngamabizo ingasuthi sibentwana abancancani le ayisangiphathi kuhle. Uyazi bonyana ibizo lami angisuye uMary nanyana uMaria. La mabizo engawanikelwa ngini lapha eJwanasbhege. Kungcono ungibize ngesibongo sami ngombana ngiyasithanda.' 'Kulungile e ... na ... NaMnde ... be ... le, uzangilibalela. Mina angisijayeli isibongo sakho.' 20 25

[Ikhasi 48–49]

- 1.2.1 Tlola isibongo salapho kubelethwa khona umkhozi kaNaMndebele. (1)
- 1.2.2 Ngikuphi okwenziwa nguNaMndebele ngamalanga nakaqeda ukuvuka? (1)
- 1.2.3 Hlathulula umehluko okhona phakathi kwakaNaMndebele nomkhozakhe. (2)
- 1.2.4 Rhunyeza isizathu esenza bona uNaMndebele azithole akilendawo akiyo etheksthini engehla. (1)
- 1.2.5 Ngokurhunyezweko veza into EYODWA uBonakele ayenzelwa ngebakwaMbuyiseli neyenza bona aledlhe. (1)
- 1.2.6 Hlathulula isizathu esabangela bona uMahlangu aphume kwakhe ayokufuna umkakhe nendodanakhe uBonakele. (1)
- 1.2.7 Ingabe indaba yokobana ababelethi bakaBonakele bezwe indaba yomdlalo wamaguduva eenrhatjhini isivezelani ngaphasi kwesizinda? Ipendulwakho ayibe liphuzu ELILODWA. (2)
- 1.2.8 Hlathulula umnqopho womtlozi wokobana asebenzise umsanyana bona azokuthenga amahabhula kuBonakele. (2)
- 1.2.9 Ingabe isenzo sakaNaSilombo sokungazwani nabomakhelana bakhe sisitjelani ngemikghwakhe mazombe? Ipendulwakho ayibe liphuzu ELILODWA. (1)
- 1.2.10 Ucabanga bona kubayini uMahlangu avezwe njengomlingisi oyihlanganisa? Ipendulwakho ayibe liphuzu ELILODWA. (2)
- 1.2.11 Ngokucabanga kwakho ingabe umtlozi bekanqophe ukuyifikisa kiliphi izinga ngaphasi kwesakhiwana senovelakhe lokha nakenza bona uBonakele alise ukusebenza ekhuweni leplasi akhethe ukuyokuhlala lapho kulahlwa khona iinkoloyi ezidala? Ipendulwakho ayibe liphuzu ELILODWA. (2)
- 1.2.12 Tshwaya ngokuphumelela komtlozi ukusethulela ummongondaba wenovela le. Ipendulwakho ayibe liphuzu ELILODWA. (1)

IMITLOMELO YESIGABA A: 35

ISIGABA B: UMDLALO

Phendula YOKE imibuzo.

UMBUZO 2: *UMNGANI* – ST Nkambule

2.1 Fundisisa itheksthi engenzasi uyizwisise bese uphendula imibuzo elandelako.

ITHEKSTHI C

UMLAKANA:	Alo kungaba njani naningangisiza sibaweni umnikelo kibosomarhwebo, emasondweni neenhlanganweni zomphakathi, mhlamunye singakghona ukuyihlanganisa imali leyo?	
BOBABILI:	<i>(Bavuma nangeenhloko.)</i> Mbono omuhle khulu lowo Mlakana.	5
UBUSI:	Unembile lapho Mlakana, banengi abentwana esibaziko abafundiswe masondo wabo, abanye bafundiswe bosomarhwebo abanetjisakalo yokusiza umphakathi abaphila kiwo.	
U-OSCAR:	Mhlamunye nathi singaba netjhu sifumane abosomarhwebo abanjalo, abanetjisakalo yokusiza abentwana abavela emphakathini abaphila kiwo, begodu nabo abafundisi abafani, bakhona abafundisi bamabandla amakhulu ababasizako abentwana abafuna ukuyokufunda.	10
UBUSI:	Kunjalo Oscar. Kwamanye amabandla ufumana abantu bebandla bamemezela esondweni bona bafuna abentwana abanetjisakalo yokufunda, bazababhadelela iindleko zokufunda.	15
UMLAKANA:	Nangabe asiphumeleli lapho, mhlamunye singasungula irhwebonyana elincazana, elinjengokuguda abantu iinhluthu nokuhlanza iinkoloyi.	20
U-OSCAR:	<i>(Amngene emlonyeni.)</i> Awa Mlakana, irhwebo lizosidlela isikhathi, begodu besivumelene ngokuthi asilifuni. Mina umbono engiwusekelako, ngewokubawa umnikelo.	
UBUSI:	<i>(Angenelela.)</i> Nami umbono womnikelo ngiwo engiwusekela khulu. Yerhwebo yona ngiyayilandula, uKhabo angasibona kwangathi simudla iinthende.	25
BOKE:	<i>(Bahleke.)</i>	
UMLAKANA:	Nakunjalo kuhle khulu. Asitholeni umsobo nephepha, sitloleni phasi incwadi esizokukhamba sibawa ngayo umnikelo.	30
U-OSCAR:	Incwadi leyo nasiqeda ukuyitlola, kufanele siyoyibethisa isitembu samapholisa, izokwazi ukukholwakala nasiyiveza ebantwini esizabe sibawa kibo umnikelo. <i>(U-Oscar ukhulume njalo bebakhupha umsobo nephepha batlola incwadi leyo.)</i>	35

[Ikhasi 29–30]

2.1.1 Tlola imikhakha EMIBILI ekuthiwa iyabasiza abentwana ngemali yokufunda emazikweni aphezulu.

(2)

- 2.1.2 Hlathulula ummongo omunyethwe yikulumo etholakala esiqetjhaneni esingehlesi. (1)
- 2.1.3 Ngokurhunyezweko hlathulula umbono ovezwa nguMlakana kuBusi no-Oscar mayelana nokuthola imali yokuzitlolisa eyunivesithi. (2)
- 2.1.4 Ngisiphi isizathu esenza bona uNaMasuku afune bona uMlakana ayokusebenza? (1)
- 2.1.5 Ngaphandle kwesikolweni ngiyiphi enye indawana lapha aboBusi naboMlakana bebahlangana khona? Ipendulwakho ayibe liphuzu ELILODWA. (1)
- 2.1.6 Ucabanga bona ngubani umdlali oyikutani emdlaweni lo begodu uyini umraro aqalene nawo? (2)
- 2.1.7 Khetha ipendulo enembako kilezi ezingenzasi.
- Umtloli womdlalo lo ngokwenza bona uMbizo noMlakana bathengise iindakamizwa eyunivesithi bekalinga ukusivezela ...
- A isingeniso.
B isithlori.
C irarano langaphakathi.
D isizinda sesikhathi. (2)
- 2.1.8 Isenzo sakaKhabo sokungafuni ukuragela phambili ngeemfundo eyunivesithi ekubeni imali ikhona simveza amdlali onjani? Ipendulwakho ayibe liphuzu ELILODWA. (1)
- 2.1.9 Hlathulula umqondo omunyethwe yikulumo kaMbizo ethi, 'ngikupha isikhathi esingaqedi ihliziyo bona uthanyele uStanza'. Ipendulwakho ayibe liphuzu ELILODWA. (2)
- 2.1.10 Ingabe yinto EHLE nofana ENGASIYIHLE yokunikela ngemali yokufunda eyunivesithi ebafundini abatlhagako? Sekela isiqunto osithathako ngephuzu ELILODWA. (1)
- 2.1.11 Tshwaya ngommoya otholakala esingenisweni somdlalo lo bewuhlathulule nokobana umthinta njani uMlakana. (2)

2.2 Fundisisa itheksthi engenzasi uyizwisise bese uphendula imibuzo elandelako.

ITHEKSTHI D

<i>(Ngebumnandini uBusi uvakatjhele uKhabo. Bahlezi bayabonisana.)</i>		
UKHABO:	<i>(Atshwenyekile.)</i> Busi mngani thula ungalili. Nawulilako ungakhulumi bona umraro ukuphi, mina ngizokwazi ngani bona utshwenywa yini?	
UBUSI:	<i>(Akhuluma alila.)</i> Khabo mnganami ngibawa isizo lakho.	5
UKHABO:	<i>(Arareke.)</i> Lisizo elinjani olibawako lelo Busi?	
UBUSI:	Ngibawa ungiphe umsebenzi erhwebeni lakho. Nanyana ngimuphi umsebenzi ulungile ngizawenza.	
UKHABO:	Kungani ufuna umsebenzi ngombana usafunda?	
UBUSI:	Ngikatelelekile bona ngisebenze Khabo.	10
UKHABO:	Uyazi Busi angazi bona ngikuphendule ngithini.	
UBUSI:	<i>(Asalila.)</i> Ngiyakubawa, ungangihlambeli izandla.	
UKHABO:	Ngiyafisa ukukusiza, kodwana ngesimo engikiso gadesi, angeze ngakghona ukukusiza.	
UBUSI:	Ulinga ukuthini?	15
UKHABO:	Izinto zijame butjhophori erhwebeni lami. Ngapha ngibhodwe ziinkolodo zentela.	
UBUSI:	<i>(Arareke)</i> Njani?	
UKHABO:	Ngikhuluma nawe nje, ngiphungula ngamalanga iinsebenzi. Nanginje ngiwile.	20
UBUSI:	Nakunje angazi bona kumele ngenzeni.	
UKHABO:	Ungazitshwenyi khulu. Ukhona uMlakana uzomondla umntwanakhe.	
UBUSI:	Uzomondla kuphi ngombana umma uthi akafuni nokumbona?	
UKHABO:	Kubangelwa yini angamfuni, kghani umtjele koke?	25
UBUSI:	Angitjho ezivela ngeentunja zomuhlwa zithi uMlakana ngasuthi urhononelwa kulabesana abathengisa iindakamizwa.	
UKHABO:	<i>(Akghodlwe livalo.)</i> I ... I ... ini ... awa.	
UBUSI:	<i>(Arareke.)</i> Alo uthuswa yini?	
UKHABO:	Angikathuki, kodwana iyangirara indaba ongitjela yona. Phela uMlakana ngimazi athanda isondo nokukhuthalela ifundo. Yeke yeendakamizwa iyangirara.	30
UBUSI:	Nami ngiyamrhononela ekuhlaselweni kuka-Oscar.	
UKHABO:	Kungani utjho njalo?	
UBUSI:	Kungombana nguye kwaphela umuntu engimaziko ongazwani no-Oscar, begodu umnganakhe uSello uyaziwa bona uyalelesa.	35
UKHABO:	Kodwana Busi lokho akutjho bona ungaze ubarhononele ngento embi kangaka.	

[Ikhasi 91–92]

2.2.1 Tlola isizathu esingunobangela wokobana uBusi avakatjhele uKhabo erhwebeni lakhe.

(1)

- 2.2.2 Ngimuphi unobangela owenza bona unina lakaBusi angafuni nokumbona uMlakana? (1)
- 2.2.3 Hlathulula ubujamo berhwebo lakaKhabo njengoba kusitjiwo etheksthini engehla le. (1)
- 2.2.4 Rhunyeza into YINYE uMlakana ebekayithandazela ngehliziyo bona ingamsiza ngemali yokuzitlolisa eyunivesithi. (1)
- 2.2.5 Ngikuphi okufanako ngokomsebenzi phakathi kwakaKhabo noMlakana? (1)
- 2.2.6 UMlakana uthi u-Oscar uthandene noBusi azi kuhle bona naye bekamfuna. Hlathulula izinto EZIMBILI uMlakana abekazenzela uBusi nebegade u-Oscar angeze azikhona. (2)
- 2.2.7 Hlathulula isisusa serarano somdlalo lo. Ipendulwakho ayibe liphuzu ELILODWA. (2)
- 2.2.8 Khetha ipendulo enembako uqedelele ngayo umutjho olandelako.
- Isehlakalo lapho sithola khona uMlakana akata uBusi ngamalanga sisivezela ... ngaphasi kwamazinga wesakhiwana somdlalo lo.
- A Isisusa serarano
B Itjharagano
C Umraro
D Isiphetho (1)
- 2.2.9 Ingabe uyokuba yini umphumela epilweni yomntwana kaBusi njengombana uyise sele abotjiwe kanti nonina uqotjiwe ekhabo? Ipendulwakho ayibe liphuzu ELILODWA. (2)
- 2.2.10 Ucabanga bona uyini ummongondaba womdlalo lo? Ipendulwakho ayibe liphuzu ELILODWA. (1)
- 2.2.11 Hlathulula umqondo omunyethwe yikulumo evezwe nguBusi ethi, 'linyoni zamasiba afanako ziphapha zodwa.' uqalise khulukhulu kilokho okwenzeka emdlalweni. (1)
- 2.2.12 Tshwaya ngelihlo elibukhali isenzo sakayise lakaBusi sokutsirimezeka ngemva kokuthola bona uBusi uzithwele. (2)
- 2.2.13 Coca ngekghono lomtlozi lokusivezela isethulo (Isingeniso) esinembako somdlalo lo. Ipendulwakho ayibe maphuzu AMABILI. (2)

IMITLOMELO YESIGABA B: 35

ISIGABA C: IINDABA EZIFITJHANI

Phendula YOKE imibuzo.

UMBUZO 3: PHOSA AMEHLO – NJ Msiza nabanye

3.1 'AKUFUDUKWA' – SF Mthombeni

Fundisisa itheksthi engenzasi uyizwisise bese uphendula imibuzo elandelako.

ITHEKSTHI E

Kusekuseni ngoMgqibelo, uMhleka uzilungiselela ukuya edorobheni ngombana inyanga iphelile. Akahlalwa yipukani umuswa wakwaNtuli, nakavelako abentazana baveza langemhlathini. Uthi angembatha, ajame aqale ngaphandle ukuthi ubonwa ngubani. Enzeni nakunje? Azange abulale ubuthongo ebusuku.	5
Umlayezo ongene kumaliledinini ubike imali ekhutjhe ngokungasiso isivumelwano sakhe. Lokho kusimanga kokugcina, nguye yedwa owazi inomoro yakhe efihlakeleko yokukhupha imali. Akhumbule bona uzakudlula kuphi ngomanyanyatha wakhe onga mlobokazi wacosobantu.	
Ungafunga uthi akakarhabeli ndawo nasele umbona nakaphuma anqophe edorobheni. IManyanga ingaphasi kwentaba ekulu begodu kuliliqhi lokha nawusuka eManyanga unqophe endleleni ekulu. Ukhamba bewulahleke.	10
Uthe bona angene endleleni ekulu wayigadanga kwaba kanye ngombana urhabele ukuthola kusavuliwe emabulungelweni nemavikilini amakhulu. Nokho imicabango yona ivundla naye ayikamlisi. Kufanele abhadale zoke iindingo zakhe. Babantu abatjha laba zabo aziqedwa. Okubuhlungu kukobana umuntu akafuni ukudlulwa angazi bonyana nanganazo ezinye izinto kufanele ayokweba kuphi.	15
UMhleka lo ngomunye ofuna ukudosa amehlo wabantu ngento engekho. Unemodere yejamo nje nezinye iinkolodo zifuna yena. Ulele angakalali aphele avuke athathe nomtjhini wokubala alinge ukuhlanganisa kutlhayele. Abuyele alale azithembise bona kuzazikhetha kusasa. Kuphele kube nelinye ivalo elimrhadlha azizwe aphelelwa mamandla.	20
[Ikhasi 90–91]	

- 3.1.1 Tlola ilanga uMhleka aya ngalo edorobheni. (1)
- 3.1.2 Rhunyeza bona uMhleka ulisokana elinjani ukuya ngehlathululo yomtloli. (2)
- 3.1.3 Hlathulula umraro uMhleka aqalene nawo njengoba agijimela ngedorobheni nje. (2)

- 3.1.4 Ngaphandle kwesikolodo sekoloyi, ingabe ngiziphi ezinye iinkolodo uMhleka ekufanele azibhadele? Ipendulwakho ayibe maphuzu AMABILI. (2)
- 3.1.5 Amagama athi, 'Nangifika esikolweni ngizakufela ngaphakathi' asitjelani ngesimilo sakaMhleka? Ipendulwakho ayibe liphuzu ELILODWA. (1)
- 3.1.6 Ucabanga bona ngiwuphi ummoya ovele endatjaneni engehla le? Sekela ipendulwakho ngephuzu ELILODWA. (2)
- 3.1.7 Hlathulula ngokukhambelana kwebizo lakaMhleka nezehlakalo ezivezwe endatjaneni le. (2)
- 3.1.8 Ucabanga bona siyini isisusa serarano endatjaneni engehla le? (1)
- 3.1.9 Khetha ipendulo enembako kilezi ezingenzasi.
- UMhleka ubonakele akhuluma yedwa endatjaneni engehla le.
Isenzo sakhesi siveza irarano:
- A Langaphandle
B Hlangana nabalingisi
C Langaphakathi
D Hlangana nomlingisi nendawo (1)
- 3.1.10 Coca wenabe ngesifundo umtlozi afuna ukusethulela sona endatjaneni engehla le bewuhlathulule nokobana isifundwesi singamthinta njani umuntu osathoma ukusebenza. (1)
- 3.1.11 Tshwaya ngelihlo elibukhali ngokukhambelana kwepilo kaMhleka nepilo yelutjha elisebenzako eliphila esikhathini sanje. Ipendulwakho ayibe liphuzu ELILODWA. (2)

3.2 'YABE YAVELA IFUKWANA' – JN Thamana

Fundisisa itheksthi engenzasi uyizwisise bese uphendula imibuzo elandelako.

ITHEKSTHI F

Nakwenziwa irhubhululo kuyavela bona abafundi abaziwa ngokuhlakanipha esikolweni samabanga aphezulu ngibo abathola ubudisi eemfundweni zemazikweni aphakamileko. Lokhu kubangelwa matjhuguluko atholakala emazikweni aphezulu. Abanye abafundi abaphiweko engqondweni abazitshwenyi ngokufunda, balalela utitjhere kwaphela babambe koke okufundisweko. Abakajayeli ukuzifundela ngombana bafuna umuntu ozobahlathululela.	5
Emazikweni aphakamileko umfundi uyazifundela, azifunele ihlathululo bekazenzele irhubhululo atlole loke ibuthelelo ngomtjhiningqondo nanyana ikhompuyutha. Akubi yinto elula kumfundi omutjha emazikweni aphakamileko. Nakuye uSidibhana kwathoma kulilitje. Indawo yitja, yikulu ineenthabathaba zeentolo eziseduze kunjalo nje ayikathuli. Wazibuza ayedwa bonyana kuyomthatha isikhathi esingangani ukujayela indawo le.	10
USidibhana nakaqala ubujamo bendawo bekabona kwangathi ulethelwe amasokana, manengi ngasuthi ahliswe ziinlori zemayini. Ubumnandi obebukhona lapho, ungagcina utjhugulukile kilokhu ebewungikho. Ngathana abentwana bayabona ukuqakatheka kwefundo nepilo, bebazakulinga kobana babalekele koke okungaliya amabhudango wabo.	15
Ababelethi bakhe bamfunela indawo yokuhlala khona eyunivesithi. Bebalinga ukubalekela iinlingo ezinengi angahle ahlangebazine nazo nakahlala emqatjhweni. Kghani kubasizile lokho namkha awa? Kwamthatha amalangana uSidibhana bonyana ajayeke indawo nekambiso yeyunivesithi. Zomuntu zona angeze waziqeda zoke. USidibhana wanele wabona ikambiso yeyunivesithi, wathoma ukweqiwa ziimfundo begodu azange kubekhona umuntu omsala emuva. Lokho kwamenza waragela phambili ngepilo ayithandako.	20 25
[Ikhasi 52–53]	

- 3.2.1 Tlola iqhinga elasetjenziwa babelethi bakaSidibhana ukumvikela eenlingweni angahle ahlangebazine nazo nakahlala emqatjhweni. (1)
- 3.2.2 Ngiliphi ibizelo elifundelwa nguSidibhana eYunivesithi yeVenda? (1)
- 3.2.3 Tlola umehluko phakathi komfundi osesikolweni samabanga aphezulu nomfundi osemaZikweni aPhakemeko wezeFundo. (2)
- 3.2.4 Ngokurhunyezweko hlathulula izinto EZIMBILI ezenza bona uSidibhana angakghoni ukuraga kuhle eemfundweni zakhe emva kokujayela eyunivesithi. (2)

- 3.2.5 Tlola into EYODWA eyenza bona uSidibhana adunyelwe yihloko eemfundweni zakhe nakasafika eyunivesithi. (1)
- 3.2.6 Hlathulula isizinda esivezwe mtloli endatjaneni engehla le. (1)
- (a) Sendawo (1)
- (b) Sesikhathi (1)
- 3.2.7 Madanisa ibizo elisekholomini A nesitatimende esisekholomini B.

IKHOLOMU A	IKHOLOMU B
(a) Bafikile	A Sikolo lapha uyise kaSidibhana bekasebenza khona angutitjherehloko
(b) Thathakhona	B Lisokana lakaSidibhana ebelimsiza ngeemfundo eyunivesithi
(c) Ayop	C Mngani kaSidibhana obekamsiza ngokumenzela imiphumela ayithumela ebabelethini bakhe
	D Lisokana lakaSidibhana ebelimupha imali
	E Ngunina kaSidibhana

(3 x 1) (3)

- 3.2.8 Hlathulula bona uvezwe amlingisi onjani unina lakaSidibhana endatjaneni engehla le? Sekela ipendulwakho ngephuzu ELILODWA (2)
- 3.2.9 Ngokubona kwakho ingabe ngisiphi isehlakalo esiveza isitlhorisendatjana engehla le? Ipendulwakho ayibe liphuzu ELILODWA. (2)
- 3.2.10 Ingabe UYAZWELANA nofana AWUZWELANI nababelethi bakaSidibhana ngokuloba imalikazi engaka babhadelela umntwanabo eyunivesithi kodwana yena wakhetha ukungafundi? Ipendulwakho ayibe liphuzu ELILODWA. (2)

IMITLOMELO YESIGABA C: 35

ISIGABA D: IINKONDLO

Phendula YOKE imibuzo.

UMBUZO 4: IMILOZANA YOKUDUMISA – M Mtsweni

4.1 Fundisisa ikondlo engenzasi uyizwisise bese uphendula imibuzo elandelako.

ITHEKSTHI G

KUFA – MS Ntuli

- 1 Uyikos' enjan' umabusa ngesidu?
- 2 Ikos' umabusa yedwa,
- 3 Ikos' ezifunz' ingasuthi.
- 4 Lis' ugoma,
- 5 Litjhing' ugoma.
- 6 Awurhalarhali kosi,
- 7 Awudunduzelwa njengomntwana.
- 8 Laph' udlule khona
- 9 Kuzwakala ngesililo.
- 10 Uyikos' enjan' umabusa ngesidu?
- 11 Ikos' engalayeziko?
- 12 Ikos' enganasihlobo?
- 13 Umngan' utlhoga namunye,
- 14 Awurhalarhali kosi,
- 15 Uketula kwamntwana,
- 16 Uketula kwayise,
- 17 Ngitjho neqhegwan' isilevu
- 18 Siqala phezulu, ngawe kosi.
- 19 Uyikos' enjan' umabusa ngesidu?
- 20 Ukukhukhutha kwaziwa nguwe,
- 21 Ukunanya kwaziwa nguwe
- 22 Ukutshetsha kwaziwa nguwe.
- 23 Ukunanaba kwaziwa nguwe.
- 24 Ophenjwe nguwe' awothiwa,
- 25 Wothiwa yihloko leya.
- 26 Ngawe sineentandani,
- 27 Ngawe sinabahlolokazi.
- 28 Kufa, ubuyaphi ngobus' obutjhotjhobeneko?
- 29 lintjhaba zoke zesaba wena,
- 30 Ubhodla ngesidu.
- 31 Uginya ngesidu.
- 32 Inaka wembatha lezulu
- 33 Lengwe lona ngaselidabukile.
- 34 Esingapheliko siyahlola:
- 35 Ngeliny' ilang' uzakuketuka nawe,
- 36 Kubus' uMenzi wepilo ngenyama.

- 4.1.1 Tlola isithombengqondo esimunyethwe mumuda ongenzasi.
'Uyikos' enjan' umabusa ngesidu?' (1)
- 4.1.2 Tlola umhlobo wevumelwano otholakala emideni engenzasi.
'Lis'ugoma,
Litjhing'ugoma.' (1)
- 4.1.3 Tlola imihlobo EMIBILI yabantu ekuthiwa babulawa kukufa ngokuya kwendima yesi-2 yekondlo engehla le. (2)
- 4.1.4 Ngokurhunyezweko hlathulula ngephuzu ELILODWA ummongondaba omunyethwe mumuda wama-20 ukuya kewama-23 esetjenziswe yimbongi ekondlweni engehla le. (1)
- 4.1.5 Hlathulula bona imbongi itjho ukuthini ngomuda othi, 'Ikosi ezifunz' ingasuthi' osetjenziswe endimeni yoku-1 yekondlo engehla le. Ipendulwakho ayibe liphuzu ELILODWA. (2)
- 4.1.6 Emudeni we-16 imbongi ithi, 'Uketula kwayise'. Ngiziphi iindlela uRhulumende azisebenzisako ukusiza abentwana ababhujelwe babelethi babo ukuze iimfuneko zabo zitjhejeke bebondleke? Ipendulwakho ayibe liphuzu ELILODWA. (2)
- 4.1.7 Ungaba yini unobangela owenza abantu bona babhubhe khulu kangaka amalanga la? Ipendulwakho ayibe liphuzu ELILODWA. (2)
- 4.1.8 Hlathulula bona mumuntu onjani okuthiwa yintandani ngokuya komuda wama-26 ekondlweni engehla. (1)
- 4.1.9 Ucabanga bona imbongi ikhuluma ngobani emudeni wama-36 wekondlo engehla le? Sekela ipendulwakho ngephuzu ELILODWA. (2)
- 4.1.10 Ngokubona kwakho, bekungaba yinto EHLE nofana ENGASIYIHLE bona woke umuntu angabhubhi aphile unomphela ephasinapha? Sekela ipendulwakho ngephuzu ELILODWA. (1)
- 4.1.11 Tshwaya ngommoya ozwakaliswa yimbongi emudeni we-16 ukuya kewe-18 bewuhlathulule nokobana uba nawuphi umthelela ebentwaneni abasakhulako. (2)

4.2 Fundisisa ikondlo engenzasi uyizwisise bese uphendula imibuzo elandelako.

ITHEKSTHI H

UMTHETHO – MS Ntuli

1 Lirholo lepilo,
2 Likhaya lesirhodl' esikhulu,
3 Uthanyel' iinzibi zedwendwe,
4 Nawungekh' ikhakhayi liyambuleka,
5 Ipil' irarana sarhara.
6 Ipil' ingenwe yihlabathi ngeendlebeni,
7 Amehl' acimez' aqalile,
8 Ukukhanya kufane nomnyama.
9 Umthetho likhande,
10 Likhande leenkutani namatjhatjha,
11 Iphasi lijame ngomthetho,
12 Wawa liyawa, kusal' amarubhi.
13 Ngomthetho siyathethelelwa,
14 Ngomthetho siyabuthelwa.

- 4.2.1 Tlola ubukondlo OBUBILI obutholakala emudeni we-11 ukuya kwe-12 yekondlo engehla le. (2)
- 4.2.2 Tlola bewuveze umhlobo wevumelwano otholakala emudeni we-13 newe-14 ekondlweni engehla le. Ipendulwakho ayibe liphuzu ELILODWA. (2)
- 4.2.3 Rhunyeza izinto EZIMBILI imbongi ethi ziyenzeka lokha umthetho nawungekho. (2)
- 4.2.4 Hlathulula bona uyini umthetho ngokuya ngekondlo engehla le. Ipendulwakho ayibe liphuzu ELILODWA. (1)
- 4.2.5 Ucabanga bona uyini umnqopho wembongi ngokusebenzisa ibuyelela mqondo elitholakala emudeni we-13 newe-14 ekondlweni engehla le? Ipendulo ayibe liphuzu ELILODWA. (2)
- 4.2.6 Hlathulula umqondo omunye ethwe mumuda we-7 ukuya kewobu-8. Ipendulwakho ayibe liphuzu ELILODWA. (2)
- 4.2.7 Ucabanga bona ngisiphi isehlakalo lapho umthetho uba likhande lamatjhatjha khona? Ipendulwakho ayibe liphuzu ELILODWA. (2)
- 4.2.8 Hlathulula okutjiwo yimbongi ngomuda we-3 wekondlo le. (1)
- 4.2.9 Ngokubona kwakho ingabe iinzibi ekukhulunywa ngazo ekondlweni engehla le ziyathanyelwa kwamambala enarheni yeSewula Afrika? Ipendulwakho ayibe liphuzu ELILODWA. (2)

- 4.2.10 Tshwaya ngokuphumelela kwembongi ukusebenzisa isithombengqondo esinembako emudeni wesi-5 wekondlo engehla le. Ipendulwakho ayibe liphuzu ELILODWA. (2)

IMITLOMELO YESIGABA D: 35
INANI LOKE: 70